

# Dlí nua

## Ceist 1

Beidh tú ag féachaint ar ball ar thuirisc faoi dhlí nua a chuideoidh le sábháilteacht ar na bóithre. Féach ar an mír uair amháin agus pléigh ábhar na míre leis an duine in aice leat.



## Ceist 2

Ar chuala tú an leagan Gaeilge de na focail agus de na frásaí seo thíos sa mhír? Cad iad?

offence	_____
drivers	_____
cyclists	_____
dangerously	_____
penalty point	_____
who will break the law	_____
legislation	_____
justly, fairly	_____
network	_____
cycle path	_____
in the short and medium term	_____

Féach ar an tuairisc le feiceáil an raibh an ceart agaibh.

## Ceist 3

Bí ag obair leis an duine in aice leat. Samhlaí go bhfuil sibh ag cur agallamh ar Shane Ross. Breacaigí síos ar a laghad seacht gceist a chuirfeadh sibh air faoin reachtaíocht nua.

## Ceist 4

'...An tAire Iompair...'

Cén t-aire atá freagrach as na cúraimí seo a leanas:

- córas iompair na tíre
- cearta an duine

- an tír a chosaint
- cúrsaí airgeadais
- an Ghaeilge a chur chun cinn
- gnóthaí eachtracha
- oideachas

Bíodh teideal ceart an aire agat as Gaeilge, chomh maith le hainm an duine sin. Mar shampla:

*An tAire Iompair, Turasóireachta agus Spóirt – Shane Ross.*

**Ceist 5**

‘...má théann...’

- A. Bí ag obair leis an duine in aice leat. Breacaigí síos na rialacha a bhaineann le ‘má’ san aimsir láithreach.
- B. Cuirigí Gaeilge ar na habairtí seo:

*If you see them, don't tell them you saw me.*

*If you buy that, you won't have any money left.*

*If he sees me here, he'll be so happy.*

*If she's back in the next 5 minutes, tell her to call me.*

*If they ask you a question, answer them truthfully.*

*If you don't work diligently, you won't get good results.*

*If Seán says that, nobody will believe him.*

*If he's working, don't disturb him.*

**Ceist 6**

Pléigh na ceistanna seo leis an duine in aice leat, nó le do ghrúpa.

1. Conas a théann tú féin chun na scoile nó chun na hoibre gach lá? Cén fáth?
2. Cad iad na buntáistí a bhaineann le rothaíocht?
3. An bhfuil bóithre na hÉireann níos sábháilte anois ná mar a bhí deich mbliana ó shin? Cén fáth?

## Treoracha agus Freagraí

### Ceist 1

Is mír an-ghearr í seo agus mar sin is féidir í a chur ar siúl den chéad uair gan mórán réamhullmhúcháin a dhéanamh.

### Ceist 2

offence – *cion*

drivers – *tiománaithe*

cyclists - *rothaithe*

dangerously – *go contúirteach*

penalty point – *pointe pionóis*

who will break the law – *a sháróidh an dlí*

legislation – *reachtaíocht*

justly, fairly – *go cothrom*

network – *líonra*

cycle path – *raon rothar*

in the short and medium term - *sa ghearr- agus sa mheántearma*

### Ceist 3

Mar shampla:

1. Cathain a chuirfear an reachtaíocht i bhfeidhm?
2. Cad atá i gceist leis an reachtaíocht nua?
3. Cén fhíneáil a ghearrfar ar sháraitheoirí an dlí?
4. Cé mhéad pointe pionóis atá i gceist?
5. Conas a chabhróidh an dlí nua seo le rothaithe a bheith níos sábháilte ar na bóithre?
6. An réiteach fadtéarmach é seo?
7. Cad eile atá ar bun agat chun rothaíocht a chur chun cinn sa tír?

### Ceist 4

Cén t-aire atá freagrach as na cúraimí seo a leanas:

- córas iompair na tíre  
*An tAire Iompair, Turasóireachta agus Spóirt – Shane Ross*
- cearta an duine  
*An tAire Dlí agus Cirt agus Comhionannais – Charles Flanagan*
- an tír a chosaint  
*An tAire Cosanta – an Taoiseach Leo Varadkar*
- cúrsaí airgeadais  
*An tAire Airgeadais agus Caiteachais Phoiblí agus Athchóirithe – Paschal Donohoe*
- an Ghaeilge a chur chun cinn  
*An tAire Cultúir, Oidhreacht agus Gaeltachta – Josepha Madigan*
- gnóthaí eachtracha  
*An tAire Gnóthaí Eachtracha agus Trádála – an Tánaiste Simon Coveney*
- oideachas  
*An tAire Oideachais agus Scileanna – Joe McHugh*

### Ceist 5

A.

- ✓ Úsáidtear **má** agus an aimsir láithreach chun tagairt a dhéanamh don am atá le teacht.
- ✓ Séimhítear an consan a leanann **má**.
- ✓ Ní shéimhítear **bí** (ach amháin i gcás 'bíonn') agus **abair** tar éis **má** – *má tá* agus *má deir*.

- ✓ Úsáidtear **bíonn**, an gnáthláithreach den bhriathar **bí**, chun tagairt don am atá le teacht.
- ✓ Is é **mura** an leagan diúltach de **má** agus leanann urú é.

B. Cuirigí Gaeilge ar na habairtí seo:

*If you see them, don't tell them you saw me.*

**Má fheiceann tú iad, ná habair leo go bhfaca tú mé.**

*If you buy that, you won't have any money left.*

**Má cheannaíonn tú é sin, ní bheidh aon airgead fágtha agat.**

*If he sees me here, he'll be so happy.*

**Má fheiceann sé anseo mé, beidh áthas an domhain air.**

*If she's back in the next 5 minutes, tell her to call me.*

**Má thagann sí ar ais faoi cheann cúig nóiméad, abair léi scairt a chur orm.**

*If they ask you a question, answer them truthfully.*

**Má chuireann siad ceist ort, freagair go hionraic iad.**

*If you don't work diligently, you won't get good results.*

**Mura n-oibríonn tú go díograiseach, ní bhfaighidh tú marcanna arda.**

*If Seán says that, nobody will believe him.*

**Má deir Seán sin, ní chreidfidh aon duine é.**

*If he's working, don't disturb him.*

**Má tá sé ag obair, ná cuir isteach air.**

#### **Ceist 6**

Is féidir gach beirt nó triúr a chur ag déanamh an phlé seo agus ansin cuid de na ceisteanna a phlé leis an rang iomlán.

**Siún Nic Gearailt**

Anois, ó mheán oíche anocht is cion a bheidh ann má théann tiománaithe thar<sup>1</sup> rothaithe ar shlí chontúirteach. Roimhe<sup>2</sup> seo, d'fhéadfaí fineáil a ghearradh ar thiománaí as gabháil thar fheithicil eile go contúirteach. Ach, baineann an dlí nua seo le rothaithe amháin. €120 agus 3 phointe pionóis a ghearrfar ar thiománaithe a sháróidh an dlí seo. Sheol an tAire Iompair, Shane Ross, an reachtaíocht inniu. Dúirt sé go raibh sé ag súil go dtarraingeodh an dlí aird ar an tábhacht a bhaineann leis an mbóthar a roinnt go cúramach agus go cothrom.

**An Comhairleoir Deirdre Donnelly, Neamhspleách, Dún Laoghaire – Ráth an Dúin**

Tá an reachtaíocht seo fíorthábhachtach. Reachtaíocht a bheidh ag dul i bhfeidhm anocht ag meán oíche, ag cur iachall<sup>3</sup> ar thiománaithe fad áirithe a choimeád idir an gluaisteán agus rothaithe ar na bóithre. Tá roinnt mhaith á dhéanamh ar ndóigh ag an gcontae agus ar fud na tíre ó thaobh níos mó, líonra níos fearr raon rothar a chur i bhfeidhm ach ní féidir é sin... ní féidir é sin a bheith ar na bóithre uilig<sup>4</sup> faoi láthair. Agus ceapaim, sa ghearr- agus sa mheántearma go gcabhraíonn sé go mór reachtaíocht mar seo a bheith i bhfeidhm.

---

<sup>1</sup> *thairis* a dúradh

<sup>2</sup> *Roimis* a dúradh

<sup>3</sup> *ag cur iallach ar* an leagan caighdeánach

<sup>4</sup> *uile* an leagan caighdeánach